

25 MAR 1999

Air-Panel

PANEL PEGUAM UMNO SEDIA BANTU RAKYAT KELANTAN SELESAI ISU AIR

KOTA BAHARU, 25 Mac (Bernama) -- Panel Peguam Umno bersedia membantu rakyat Kelantan, yang tidak berpuas hati dengan cara kerajaan negeri Pas mengatasi masalah air, untuk mengambil tindakan melalui saluran undang-undang.

Pengerusi Panel Peguam Umno Senator Datuk Ibrahim Ali berkata tindakan melalui saluran undang-undang adalah lebih baik daripada mengadakan tunjuk perasaan, katanya pada sidang berita di Jabatan Pembangunan Persekutuan (JPP) di sini, hari ini.

Ibrahim yang juga Timbalan Menteri di Jabatan Perdana Menteri berkata demikian berikutan kira-kira 200 orang mengadakan tunjuk perasaan di Dataran Majlis Perbandaran Kota Baharu (MPKB) Isnin lepas, menuntut kerajaan negeri menyelesaikan masalah bekalan air di Kelantan.

Masalah bekalan air di negeri itu bermula sejak konsesi perswastaaan air ditandatangani antara kerajaan negeri dan Kelantan Water Sdn Berhad (KWSB) pada 1995.

Selain itu, Ibrahim berkata kira-kira 50,000 orang akan menghadiri perhimpunan pemimpin bersama rakyat sempena lawatan Perdana Menteri Datuk Seri Dr Mahathir Mohamad ke Kelantan pada 23 dan 24 April ini.

Perhimpunan tersebut akan diadakan di padang Sekolah Menengah Tengku Panglima Raja di Pasir Mas.

Katanya, antara tujuan perhimpunan itu ialah mengajak rakyat bersatu menentang musuh dari dalam dan luar negara yang cuba menggugat kestabilan politik dan keamanan negara.

Rakyat juga akan berpeluang mendengar penjelasan daripada Perdana Menteri berhubung isu-isu muktahir yang berlaku di dalam dan luar negara, katanya.

--BERNAMA

BD RI